



CONFERENCE EPISCOPALE DU RWANDA

Secrétariat Général

B.P. 357 Kigali / Rwanda

Tél. : (+250) 252 575 439

E-mail : eglisecatholiquerwanda@gmail.com

UKARISTIYA: ISOKO Y'UBUZIMA, IMPUHWE N'UBWIYUNGE

Bakristu, Bavandimwe,

1. Kuri iki cyumweru duhimbazaho umunsi mukuru wa Kristu Umwami w'ibiremwa byose, twebwe Abepiskopi banyu, tunejejwe no kubagezaho ubutumwa bwihariye, bujyana n'ihibazwa ry'Ikoraniro Mpuzamahanga ry'Ukaristiya. Kandi koko, Kristu Umwami Nyiringoma zose z'isi, ni na We uganje mu Ukaristiya.
2. Amasomo matagatifu y'iki cyumweru adufasha kurushaho kumva ibanga ry'Umwami wacu Yezu Kristu mu Ukaristiya, Yo soko y'ubuzima, impuhwe n'ubwiyunge, nk'uko twifuje ko byaba insanganyamatsiko ngenderwaho muri iki gihe cyo kwitegura ndetse no guhimbaza Ikoraniro ry'Ukaristiya.
3. Kristu ni We Mutwe w'Umubiri ari wo Kiliziya. Twese abacunguwe na We, muri We turi ingingo z'umubiri umwe: ni ukuvuga umuryango umwe w'abana b'Imana, aho buri wese yageza aho abwira mugenzi we ati “*Ndi igufa ryawe n'umubiri wawe*” (2 Sam 5, 1).
4. Imana ni Yo Soko y'ubuzima, kandi ni Yo ibutanga ku buryo bwuzuye (reba Yh 10,10). Ni Yo yonyine isubiza ubuzima abana bayo igihe babutakaje, ikababarira igihe bacumuye. Koko rero, Yezu Umwana wayo yadukunze kugeza ku ndunduro: ku musaraba yitanze ho igitambo maze muri We *Imana yiyunga n'ibiraho byose, ibisakazamo amahoro aturutse ku maraso ye* (reba Kol 1,20). Mu Ukaristiya Ntagatifu duhabwa Kristu watwitangiye, akatwunga n'Imana n'abavandimwe bacu. Ni We Mwami utugobotora mu nzara z'urupfu akadukingurira amarembo y'ubuzima.

1. IKORANIRO MPUZAMAHANGA RY'UKARISTIYA

Bakristu, Bavandimwe,

5. Mu mwaka utaha, ku matariki ya 13-20 Nzeri 2020, i Budapest muri Hongriya hazabera ikoraniro mpuzamahanga ry'Ukaristiya, rizaba ari irya 52 kuva amakoraniro nk'ayo yatangira kubaho mu mwaka w'1881, ku bwa Papa Lewo wa XIII. Ni ubundi buryo bw'iyogezabutumwa, maze koko ibyishimo n'imbabaro y'isi Kiliziya ikabigira ibayyo, ibishyiramo urumuri n'ubuzima bwa Yezu Kristu Umwami n'Umukiza w'abantu bose.

6. Iryo koraniro rigamije gufasha abantu kurushaho kumenya no gukunda Nyagasani Yezu Kristu Umwami wacu mu Isakramentu ry'Ukaristiya, ari naryo zingiro ry'ubuzima bwa Kiliziya n'iremezo ry'ubutumwa bwayo bwo kugeza umukiro kuri bose. Ni byo Papa Yohani Pawulo wa kabiri yibukije mu ibaruwa ye “*Kiliziya ibeshwaho n'Ukaristiya*”, ashimangira ko Ukaristiya ari yo itunze Kiliziya

kandi ikanayimurikira (n° 6). Nanone kandi, iryo koraniro rigamije gutuma abantu barushaho gucengerwa n'ibanga ry'Ukaristiya uhoreye mu kuyihimbaza ku buryo bunoze mu Misa ntagatifu kugeza ku cyubahiro n'ubuyoboke tuyigaragariza ahataru mu Misa.

7. Insanganyamatsiko yahawe ikoraniro mpuzamahanga ry'umwaka utaha ku rwego rwa Kiliziya y'isi yose iragira iti: “*Ni wowe soko y'imigisha yacu yose*” (Zab 87,7). N'ubwo ikoraniro riba rifite aho ribera hateguwe, ni irya Kiliziya yose; abakristu ku isi hose bagashishikarizwa kuryitabira mu isengesho n'ibindi bikorwa nyobokamana. Ni yo mpamvu twasanze ari byiza ko hano iwacu mu Rwanda twahimbaza natwe ikoraniro ry'Ukaristiya, ariko tunareba umwihihiko wacu nk'Abanyarwanda mu mateka twihariye no mu rugendo twagenze kandi tugikomeza, hanyuma duhitamo insanganyamatsiko igira iti: “**Ukaristiya: isoko y'ubuzima, impuhwe n'ubwiyunge**”. Twemera rwose ko mu guhabwa Yezu Kristu Umwami wacu mu Ukaristiya ari ho dukura imbaraga zo kunga ubumwe n'Imana Data, na bagenzi bacu tuba twasangiye umubiri umwe.

2. UKARISTIYA: ISOKO Y'UBUZIMA, IMPUHWE N'UBWIYUNGE

Ukaristiya ni isoko y'ubuzima

8. Mu Ukaristiya, Yezu Kristu Umwami n'Umukiza wacu arimo rwose, arimo wese, atwitayeho kandi aradukiza, kuko ari we ubwe ukorera muri Kiliziya Ye kandi akayikirizamo abamugana bose. Ukaristiya ni imbuto y'urukundo rwe rwitanga kugera ndetse no gupfa, kugirango isi yose igire ubuzima (reba Kiliziya ibeshwaho n'Ukaristiya, no 11). Araturembuza, atubwira ati : “*Nimutarya umubiri w'Umwana w'umuntu, ntimunywe n'amaraso ye, ntimuzagira ubugingo muri mwe*” (Yh 6,53). Yezu iyo tumusanze tukamuhabwa, mu by'ukuri ni We utwakira akaturuhura, akadukiza kubaho tutariho, akaduha ubuzima busendereye, akaduha gusa na We.

Ukaristiya ni isoko y'urukundo n'impuhwe

9. Yezu mu Ukaristiya aturebana ya neza ye ihora igambiriye kudukura ahabi, kudukiza icyaha n'icyago, kutwunga n'Imana no kutugoboka aho tubabaye hose: ni wa mutima utirengagiza akaga undi yaba arimo, ni rwa rukundo nyampuhwe rutagamburuzwa n'inabi cyangwa ubuhemu. Ndetse rukatubashisha no gufata iya mbere mu gusaba imbabazi no kubabarira kugirango duse koko na Nyagasani Umwami wacu duhabwa kandi tugenze nka we. Yezu iyo tumugannye tumwizeye atwumva vuba, akatubarira bwangu nk'uko yagenjereje uriya bari babambanywe wamwiyambaje (reba Lk 23,42-43).

Ukaristiya ni isoko y'ubwiyunge

10. Nk'uko Mutagatifu Luka abitubwira, n'ubwo Yezu Kristu ari Umwami, yemeye guca bugufi, arasuzugurwa, arababara (reba Lk 23,35). Mu rupfu rwe ku musaraba, Imana yigoroye n'abantu bose. Pawulo Mutagatifu ni we ubihamya agira ati: “*Muri Yezu Kristu, mwebwe abari kure y'Imana kera, mwigijwe bugufi yayo mubikesha amaraso ya Kristu*” (Ef 2,13). Bityo, mu Ukaristiya Yezu atwunga n'Imana kandi akawunga n'abavandimwe, akaduha n'imbaraga zo guharanira ubumwe adahwema kudusabira, ngo tube umwe nk'uko ahora ari umwe na Se (reba Yh 17,22). Ukaristiya rero ni yo itubashisha kwiyunga na bagenzi bacu, mu bwiyoroshye no mu kuri kudasibanganya ubudasa, ahubwo

ku bwa Yezu nyine tukibanda ku bitubohora bibohora na bagenzi bacu, ngo dukomezanye urugendo rw'ubuvandimwe dukesha uwadukunze akemera kutubera icyarimwe igitambo, ifunguro n'inshuti tubana.

3. GAHUNDA Y'IKORANIRO RY'UKARISTIYA IWACU MU RWANDA

Bakristu, Bavandimwe,

11. Guhimbaza ikoraniro ry'Ukaristiya bizarangwa n'ibikorwa binyuranye bizakorerwa mu maparuwasi yacu bijyana n'ukwemera dufite muri Ukaristiya ntagatifu. Ku rwego rwa buri diyosezi, ibyo bikorwa bizahuzwa n'umunsi mukuru w'Isakaramentu ritagatifu, uzaba ku itariki ya 14 Kamena 2020. Ku rwego rw'igihugu, ikoraniro rizabera i Kigali ku cyumweru, tariki ya 28 Kamena 2020.

12. Turabasaba kwitabira ibikorwa byose bizabafasha muri urwo urugendo rwo kwivugurura no guhugukira Ukaristiya ntagatifu. Muri diyosezi zose zo mu Rwanda muzitabire gukurikira inyigisho, ibiganiro mbwirwaruhame bisobanura ibanga ry'Ukaristiya, ndetse n'ubuhamya ku mbuto z'Isakaramentu ry'Ukaristiya mu buzima no mu mibanire yacu. Hari ibyo tubararikiye kwitaho ku buryo bw'umwihariko:

- Kurushaho kunoza imihimbarize y'igitambo cya Misa uko Kiliziya ibiteganya, mu buyoboke no mu cyubahiro gikwiye;
- Kurushaho guha agaciro umunsi w'icyumweru no kuwusobanukira;
- Kugira umwanya uzwi kandi uboneye wo gushengerera Isakramentu ritagatifu mu rwego rwa paruwasi, santarali, shapeli, no mu ngo z'abasaserdoti n'abihayimana;
- Guhugukira inyigisho zisobanura rwose uburyo Ukaristiya ari Isakramentu ritagatifu ry'umubiri n'amaraso bya Yezu Kristu: ko arimo rwose kandi wese, akaba ubuzima n'imbaraga za Kiliziya ye;
- Kwibwiriza ibikorwa by'ubwitange mu gufasha abandi cyane cyane abakene, kimwe no kugaragaza ubumwe, ubuvandimwe n'impuhwe muri twe, kuko twebwe abasangira Yezu mu Ukaristiya tugomba no gufata iya mbere mu kubaka isi izira ubusumbane n'akarengane, mu gihe tugitegereje ihindukira rya Nyagasani.

13. Koko igihe kirageze ngo twumve kurushaho ko muri Yezu Kristu, We shusho y'Imana itagaragara (reba Kol 1,15), Imana yadukunze bitagira urugero, ikabitugaragariza ku buryo bweruye kandi budasubirwaho, maze na Yezu ubwe akadusigira isakramentu ry'agatangaza dusabaniramo na We, tukamureba n'amaso yacu, tukamuhabwa mu mubiri wacu We Nyirubutagatifu, Umwami udukunda byahebuje. Ntatumena n'ubwo nta cyacu ayobewe, ahubwo yishimira gutura iwacu no kugendana natwe kugira ngo adukomeze mu nzira y'amajyambere duharanira, no mu rugendo rw'ubwiyunge butuganisha ku bumwe yaturaze kandi adahwema kudusabira.

14. Dusoje tubifuriza ko guhimbaza Ikoraniro ry'Ukaristiya byababera akanya ko kwivugurura no kunagura ibyo twaba twararangaranye kandi ari ho tujishiye ubuzima: duhimbaze igitambo cya Misa tuzi uwo turi kumwe na we n'ibyiza byinshi atugabira, tumushengerere tumuganiriza mu mutima wacu kandi tumutura igihugu cyacu n'abakiyobora kugirango ubwitange busarure imbuto z'ubutabera, amahoro n'ubusabane nyakuri. Ibi kandi twumve neza ko tutabyigezaho twenyine: ahubwo

tubishobozwa na Nyagasanî Yezu Kristu utwiha mu Isakramentu ry'Ukaristiya akatugira abavandimwe; nakomeze atubere twese isoko y'ubuzima, y'urukundo nyampuhwe, n'iy'ubwiyunge butugeza ku bumwe bwuzuye.

Tubifuriye kuzatangira neza igihe cy'Adventi idutegurira guhimbaza ukwigira umuntu kwa Jambo. Tubaragije Bikira Mariya Umwamikazi wa Kibeho twitegura guhimbaza. Imana ibahe umugisha.

Bikorewe i Kigali, kuwa 24 Ugushyingo 2019.

Abepiskopi banyu:

✠ Filipo RUKAMBA,

Umwepiskopi wa Butare

akaba na Perezida w'Inama y'Abepiskopi Gatolika mu Rwanda

+ *Rukamba*

✠ Antoni KAMBANDA,

Arikiyepiskopi wa Kigali

n'Umuyobozi wa Diyosezi ya Kibungo

+ *Antoni*

✠ Serviliyani NZAKAMWITA

Umwepiskopi wa Byumba

+ *Serviliyani*

✠ Smaragde MBONYINTEGE

Umwepiskopi wa Kabgayi

+ *Smaragde*

✠ Visenti HAROLIMANA

Umwepiskopi wa Ruhengeri

+ *Visenti*

✠ Selestini HAKIZIMANA

Umwepiskopi wa Gikongoro

n'Umuyobozi wa Diyosezi ya Cyangugu

Hakizimana

✠ Anacleti MWUMVANEZA

Umwepiskopi wa Nyundo

+ *Anacleti*